

Bosna i Hercegovina  
Federacija Bosne i Hercegovine  
Kanton Sarajevo  
Grad Sarajevo  
Općina Centar Sarajevo

Komisija za Statut i propise

**S T A T U T**  
**OPĆINE CENTAR SARAJEVO**  
**(prečišćeni tekst)**

Sarajevo, septembar/rujan 2004. godine

Na osnovu člana 118. Poslovnika Općinskog vijeća Centar Sarajevo ("Službene novine Kantona Sarajevo", br. 14/02, 29/03 i 13/04) i člana 68. Statuta Općine Centar Sarajevo ("Službene novine Kantona Sarajevo", br. 10/02, 2/04 i 13/04), Komisija za Statut i propise, na 80 sjednici održanoj dana 21.09.2004. godine, utvrdila je prečišćeni tekst Statuta Općine Centar Sarajevo.

Prečišćeni tekst Statuta Općine Centar Sarajevo obuhvata: Statut Općine Centar Sarajevo ("Službene novine Kantona Sarajevo", broj 10/02), Amandman I na Statut Općine Centar Sarajevo ("Službene novine Kantona Sarajevo", broj 2/04), Amandmani II-VII na Statut Općine Centar Sarajevo ("Službene novine Kantona Sarajevo" broj 13/04) i Ispravka Amandmana II-VIII na Statut Općine Centar Sarajevo ("Službene novine Kantona Sarajevo", broj 17/04) u kojima je označen dan stupanja na snagu tih Statuta.

Broj: 01-49-1925/04  
Sarajevo, 21.09.2004. godine

PREDSJEDNIK  
KOMISIJE ZA STATUT I PROPISE

Jasmina Trgovčević

## **S T A T U T** **OPĆINE CENTAR SARAJEVO** **(prečišćeni tekst)**

### **I – OPĆE ODREDBE**

#### Član 1.

Ovim statutom, u skladu sa ustavom i zakonom, uređuje se organizacija Općine Centar Sarajevo, njene nadležnosti, struktura vlasti, ostvarivanje lokalne samouprave i druga pitanja od značaja za organizaciju i rad Općine Centar Sarajevo.

#### Član 2.

Područje Općine Centar Sarajevo određuje se Zakonom.  
Promjene granica Općine Centar Sarajevo mogu biti izvršene zakonom, uz prethodnu saglasnost Općinskog vijeća.

#### Član 3.

Naziv Općine je: Općina Centar Sarajevo.  
U ravnopravnoj upotrebi je naziv: Opština Centar Sarajevo.  
Sjedište Općine je u Sarajevu, ulica Miss Irbi broj 1.

#### Član 4.

Općina Centar Sarajevo (u daljem tekstu: Općina) je pravno lice, sa pravima i obavezama utvrđenim ustavom, zakonom i ovim statutom.

## Član 5.

Općina ima grb i zastavu, pečat i druga obilježja.

Sadržaj i oblik grba i zastave, pečata i drugih obilježja, njihovu izradu i korištenje utvrđuje Općinsko vijeće odlukom.

## Član 6.

Općina može ostvarivati saradnju sa drugim općinama i gradovima, radi ostvarivanja zajedničkog interesa.

Općina može pristupiti međunarodnim udruženjima lokalnih zajednica i sarađivati sa odgovarajućim lokalnim jedinicama drugih država.

Odluku o ostvarivanju saradnje, oblicima saradnje i odluku o pristupanju međunarodnim udruženjima donosi Općinsko vijeće, pod uslovima i na način propisan ustavom, zakonom i ovim statutom.

## **II-SAMOUPRAVNI DJELOKRUG OPĆINE**

### Član 7.

Općina u okviru samoupravnog djelokruga, u skladu sa ustavom i zakonom, naročito:

- osigurava uslove i preduzima sve potrebne mjere za dosljedno poštivanje i zaštitu ljudskih prava i sloboda;
- osigurava lokalne potrebe stanovništva u oblasti brige o djeci, obrazovanju i odgoju, radu i zapošljavanju, socijalnoj zaštiti, kulturi, fizičkoj kulturi, sportu i zaštiti i unapređenju životne okoline;
- osigurava uslove za razvoj privrede od značaja za Općinu;
- vodi urbanističko-stambenu politiku od značaja za Općinu i njen razvoj;
- upravlja općinskom imovinom;
- osigurava obavljanje komunalnih i drugih uslužnih djelatnosti;
- osigurava i razvija lokalnu infrastrukturu;
- osigurava uslove rada lokalnih radio i TV stanica;
- vodi brigu o turističkim resursima Općine;
- uređuje i stvara uslove za racionalno korištenje i upravljanje građevinskim zemljištem i poslovnim prostorima;
- osigurava uslove za ostvarivanje mjesne samouprave;
- osniva javne ustanove i druga pravna lica od interesa za Općinu;
- osigurava javni red i mir;
- obavlja upravne poslove iz samoupravnog djelokruga Općine, kao i prenesene upravne poslove;
- obavlja i druge poslove koji su od značaja za Općinu koji su utvrđeni ustavom i zakonom.

## **III-ORGANI OPĆINSKE VLASTI**

### **Općinsko vijeće**

### Član 8.

Općinsko vijeće je predstavničko tijelo građana Općine, koje funkciju vlasti vrši u skladu sa ustavom, zakonom i ovim statutom.

### Član 9.

Općinsko vijeće broji 31 vijećnika.

Izbor vijećnika Općinskog vijeća vrši se na način i po postupku utvrđenim Izbornim zakonom.

## Član 10.

Općinsko vijeće:

- utvrđuje općinsku politiku i prati njeno ostvarivanje;
- priprema i donosi Statut Općine i Poslovnik o radu Općinskog vijeća (u daljem tekstu: Poslovnik), donosi odluke, druge propise i opće akte i daje njihovo tumačenje;
- bira i smjenjuje predsjedavajućeg Općinskog vijeća i njegovog zamjenika, sekretara Općinskog vijeća, kao i članove radnih tijela Općinskog vijeća;
- vrši izbor vijećnika u sastav Gradskog vijeća;
- donosi budžet i usvaja izvještaj o izvršenju budžeta, donosi propise o općinskim taksama i porezima i na drugi način osigurava potrebna finansijska sredstva u skladu sa zakonom;
- upravlja imovinom Općine i odlučuje o njenom sticanju i raspolaganju; obrazuje organe, državna i radna tijela i službe, utvrđuje njihovu nadležnost i sastav;
- osniva javna preduzeća i javne ustanove i druga pravna lica za obavljanje djelatnosti od interesa za Općinu;
- raspisuje referendum;
- raspisuje javni zajam i samodoprinos i odlučuje o zaduženju Općine;
- vrši nadzor nad radom organa i službi Općine, kao i javnih institucija koje osniva;
- vrši uvid u rad institucija koje svoje funkcije obavljaju na području i za potrebe Općine i predlaže mjere za unapređenje rada;
- obrazuje organ koji u drugom stepenu rješava po žalbi protiv prvostepenih rješenja Općinskog načelnika, donesenih na osnovu Statuta ili propisa Općinskog vijeća;
- donosi odluku o osnivanju i ukidanju mjesne zajednice i donosi pravila mjesne zajednice;
- pokreće inicijativu za izmjene i dopune zakona i drugih propisa;
- donosi odluke o općinskim priznanjima i nagradama;
- podnosi inicijativu za davanje i izmjenu naziva ulica, trgova, mostova i drugo;
- vrši druge poslove utvrđene zakonom, drugim propisima i ovim statutom.

## Član 11.

Organizacija i način rada Općinskog vijeća detaljnije se uređuje Poslovnikom.

## Član 12.

Rad Općinskog vijeća je javan.

Izuzetno, Općinsko vijeće može odlučiti da određena pitanja razmatra bez prisustva javnosti.

## Član 13.

Općinsko vijeće donosi odluke većinom glasova ukupnog broja vijećnika, na način koji je regulisan Poslovnikom.

Statut, Budžet i izvještaj o izvršenju budžeta, odluku o osnivanju i odluku o ukidanju mjesne zajednice, saglasnost za promjene granica Općine i odluku o prenošenju poslova iz samoupravnog djelokruga Općine, Općinsko vijeće donosi dvotrećinskom većinom glasova ukupnog broja vijećnika.

## Član 14.

Prva sjednica Općinskog vijeća u novom sazivu biće održana najkasnije trideset dana od dana objavljivanja rezultata izbora.

## Član 15.

Prvu sjednicu Općinskog vijeća u novom sazivu, saziva predsjedavajući prethodnog saziva Općinskog vijeća i njome predsjedava do izbora novog predsjedavajućeg Općinskog vijeća.

Ako predsjedavajući Općinskog vijeća prethodnog saziva ili njegov zamjenik ne sazove konstitutivnu sjednicu u roku iz prethodnog člana, sjednicu će sazvati najstariji vijećnik novog saziva.

## Član 16.

Na prvoj sjednici Općinskog vijeća, većinom glasova ukupnog broja vijećnika vrši se izbor predsjedavajućeg i zamjenika predsjedavajućeg Općinskog vijeća i sekretara Općinskog vijeća.

Predsjedavajući Općinskog vijeća i Općinski načelnik ne mogu biti iz reda istog naroda.

## Član 17.

Predsjedavajući predstavlja Općinsko vijeće i predsjedava sjednicama Općinskog vijeća.

Mandat predsjedavajućeg i zamjenika predsjedavajućeg Općinskog vijeća traje do isteka mandata vijećnika.

Predsjedavajući, odnosno zamjenik predsjedavajućeg Općinskog vijeća mogu svoju dužnost obavljati profesionalno, o čemu odlučuje Općinsko vijeće.

## Član 18.

Sekretar Općinskog vijeća svoju dužnost obavlja profesionalno, na način utvrđen Poslovníkom.

Sekretar Općinskog vijeća vrši dužnost do isteka mandata Općinskog vijeća i ostaje na funkciji do izbora novog sekretara.

## Član 19.

Predsjedavajući Općinskog vijeća, njegov zamjenik i sekretar Općinskog vijeća, mogu podnijeti ostavku, odnosno mogu biti razriješeni ili smijenjeni prije isteka mandata odlukom Općinskog vijeća, koja je donesena dvotrećinskom većinom glasova ukupnog broja vijećnika.

## Član 20.

Općinsko vijeće može obrazovati komisije, savjete, odbore, radne grupe i druga stalna i povremena radna tijela, čiji se sastav, djelokrug i način rada uređuje Poslovníkom, odnosno odlukom o obrazovanju.

## Član 21.

Članovi radnih tijela Općinskog vijeća imaju pravo na naknadu i druga prava utvrđena odlukom Općinskog vijeća u skladu sa zakonom.

## **Općinski načelnik**

## Član 22.

Općinski načelnik je izvršno- upravni organ Općine.

## Član 23.

Općinski načelnik obavlja dužnost za vrijeme na koje je izabran. Općinski načelnik može podnijeti ostavku. Općinski načelnik može biti opozvan na način i po postupku utvrđenim Zakonom o direktnom izboru Općinskog načelnika u Federaciji Bosne i Hercegovine („Službene novine Federacije Bosne i Hercegovine“, broj 20/04).

Općinski načelnik ostaje na funkciji do izbora novog Općinskog načelnika, a obavezan je izvršiti primopredaju dužnosti na način i pod uslovima utvrđenim Poslovníkom.

## Član 24.

Općinskog načelnika za slučaj spriječenosti da obavlja svoju dužnost ili ako je opozvan, privremeno mijenja predsjedavajući Općinskog vijeća, za to vrijeme sjednicama vijeća predsjedava zamjenik predsjedavajućeg Općinskog vijeća.

U slučaju spriječenosti predsjedavajućeg Općinskog vijeća odnosno nemogućnosti da mijenja Općinskog načelnika, Općinskog načelnika mijenja vijećnik kojeg većinom glasova izabere Općinsko vijeće.

## Član 25.

Općinski načelnik, kao izvršno-upravni organ u Općini, u skladu sa ustavom, zakonom i ovim statutom obavlja poslove lokalne samouprave, i poslove uprave iz djelokruga Općine, kao i prenesene poslove kantonalne uprave, a naročito:

- predstavlja i zastupa Općinu u skladu sa ustavom, zakonom i Statutom;
- utvrđuje prijedlog budžeta, odluka i drugih propisa Općinskog vijeća;
- zaključuje ugovore u ime Općine u skladu sa općim i pojedinačnim aktima Općinskog vijeća;
- donosi opće i pojedinačne akte iz svoje nadležnosti;
- obrazuje stalne i povremene komisije ili radne grupe;
- obavlja i druge poslove utvrđene zakonom, drugim propisima, ovim statutom i aktima Općinskog vijeća.

## Član 26.

Poslove iz prethodnog člana Općinski načelnik vrši samostalno i putem službi za upravu u sastavu Jedinog općinskog organa uprave i ostalih općinskih službi.

## **Sudska vlast**

### Član 27.

Sudsku vlast u Općini vrši Općinski sud u Sarajevu.

## **IV – OPĆINSKI VIJEĆNIK**

### Član 28.

Općinski vijećnik (u daljem tekstu: vijećnik) je predstavnik građana u Općinskom vijeću, izabran neposrednim i tajnim glasanjem, sa mandatom, pravima i obavezama propisanim ustavom, zakonom i ovim statutom.

### Član 29.

Vijećnik vrši svoje dužnosti prema svom slobodnom uvjerenju.

Vijećnik se u javnom životu treba ponašati na primjeren i etičan način, te obavljati svoje dužnosti savjesno i isključivo za dobrobit građana i Općine.

#### Član 30.

U vršenju svoje dužnosti u okviru lokalne samouprave, vijećnik naročito:

- učestvuje u donošenju odluka iz nadležnosti Općinskog vijeća i doprinosi kreiranju i provođenju općinske politike, kroz izvršavanje zakona, drugih propisa i općih akata;
  - pokreće rasprave i daje inicijative za razmatranje i rješavanje pitanja iz nadležnosti Općinskog vijeća;
  - predlaže donošenje odluka iz nadležnosti Općinskog vijeća;
  - postavlja vijećnička pitanja o ostvarivanju i zaštiti prava građana u provođenju zakona i drugih propisa, te zakonitosti rada i postupanja organa uprave, odnosno institucija koje imaju javna ovlaštenja;
  - brine se o ostvarivanju potreba građana, mjesnih zajednica i Općine;
- Vijećnici izabrani u Gradsko vijeće podnose izvještaj o svom radu Općinskom vijeću.

#### Član 31.

Vijećnik ima pravo na naknadu za rad i druga prava za vrijeme vršenja funkcije vijećnika.

O pravima vijećnika iz predhodnog stava, odlučuje Općinsko vijeće.

### **V – MJESNA ZAJEDNICA**

#### Član 32.

Mjesnu zajednicu, kao oblik učestvovanja građana u odlučivanju o poslovima od neposrednog interesa građana, osniva Općinsko vijeće.

Odlukom o osnivanju mjesne zajednice utvrđuje se naziv, sjedište, teritorija, mjesna područja mjesne zajednice i druga pitanja.

#### Član 33.

Mjesno područje je teritorijalno određen dio mjesne zajednice, koji čini jednu ili više međusobno povezanih naseljenih mjesta, odnosno naselja ili dio naseljenog mjesta koji čini zasebnu cjelinu.

#### Član 34.

Mjesna zajednica se osniva, na način i po postupku utvrđenim zakonom, ovim statutom i Pravilima mjesne zajednice.

Inicijativu za osnivanje mjesne zajednice mogu pokrenuti građani, organizacije i udruženja građana sa područja za koje se predlaže osnivanje mjesne zajednice, vijećnici Općinskog vijeća i Općinski načelnik.

#### Član 35.

U mjesnoj zajednici građani poslove od neposrednog interesa ostvaruju kroz organe mjesne zajednice i oblike neposrednog učestvovanja građana u odlučivanju radi ostvarivanja komunalnih, socijalnih, kulturnih, ekoloških i drugih potreba, vodeći računa o vrsti i obimu potreba, raspoloživim sredstvima, kao i interesima građana u cjelini.

#### Član 36.

Općina može, uz obezbjeđenje finansijskih sredstava, prenijeti na mjesnu zajednicu izvršavanje određenih poslova iz svoje nadležnosti, a naročito izgradnju, održavanje i upravljanje objektima za potrebe obrazovanja, sporta, kulture, kao i drugih sadržaja.

Odluku o prenosu poslova iz prethodnog stava donosi Općinsko vijeće.

#### Član 37.

Ukoliko je u mjesnoj zajednici organizovano izvršavanje određenih decentraliziranih poslova, za čije obavljanje neposredno nije nadležna Općina, predstavnici organa mjesne zajednice i decentralizovanih poslova obavezni su ostvarivati koordinaciju i saradnju u cilju podizanja nivoa saradnje i kvaliteta usluga.

#### Član 38.

Prava i dužnosti mjesnih zajednica, utvrđena zakonom i ovim statutom, ne mogu biti uskraćena ili ograničena od općinske ili druge vlasti.

#### Član 39.

Organi mjesne zajednice su:

- savjet mjesne zajednice,
- zbor građana mjesne zajednice.

#### Član 40.

Savjet mjesne zajednice je organ odlučivanja i konsultovanja o pitanjima od neposrednog interesa građana mjesne zajednice, koja su utvrđena zakonom, ovim statutom i Pravilima mjesne zajednice.

#### Član 41.

Savjet mjesne zajednice donosi programe i planove rada, koji moraju biti usklađeni sa Programom rada Općinskog vijeća.

#### Član 42.

Savjet mjesne zajednice odlučuje o poslovima koji se finansiraju iz sredstava koja se neposredno prikupljaju od građana ili na drugi način i prenesenim poslovima iz člana 36. ovog statuta, kao i prijedlogu za raspisivanje referenduma.

#### Član 43.

Prije donošenja odluke iz svoje nadležnosti, savjet mjesne zajednice je dužan konsultovati zbor građana mjesne zajednice.

#### Član 44.

Savjet mjesne zajednice će biti obavezno konsultovan o pitanjima o kojima Općinsko vijeće odlučuje dvotrećinskom većinom i u postupku donošenja planova Općine.

Konsultovanje iz prethodnog stava vrši se u fazi priprema i u postupku donošenja odluka, na način utvrđen Pravilima mjesne zajednice.

Savjet mjesne zajednice je obavezan dati mišljenje i o drugim pitanjima o kojima je zatražena konsultacija od Općinskog vijeća ili Općinskog načelnika.

O ostalim pitanjima Savjet mjesne zajednice će biti konsultovan na način i pod uslovima utvrđenim Pravilima mjesne zajednice.

#### Član 45.

Član savjeta mjesne zajednice je predstavnik građana mjesnih područja izabran neposrednim, tajnim glasanjem, sa mandatom, pravima i obavezama propisanim ovim statutom i Pravilima mjesne zajednice.



Za člana savjeta mjesne zajednice može biti biran građanin, upisan u birački spisak Općine Centar Sarajevo (u daljem tekstu: birački spisak), sa prebivalištem na području mjesne zajednice.

Strani državljani sa boravištem na području mjesne zajednice najmanje godinu dana prije održavanja izbora može biti počasni član savjeta mjesne zajednice, o čemu odlučuje savjet mjesne zajednice.

Izbori za članove Savjeta mjesne zajednice održavaju se u roku od godinu dana po održavanju izbora za Općinsko vijeće.

Mandat članova savjeta mjesne zajednice traje 4 godine.

Broj članova savjeta mjesne zajednice utvrđuje se Odlukom o osnivanju prema broju građana, upisanih u birački spisak, nastanjenih na području mjesne zajednice, s tim da svako mjesno područje u Savjetu mjesne zajednice mora biti zastupljeno sa najmanje jednim članom.

Ostala pitanja o načinu i postupku izbora za članove savjeta uredit će se Pravilima mjesne zajednice, u skladu sa ovim statutom i Odlukom o osnivanju mjesne zajednice.

#### Član 46.

Prva sjednica savjeta mjesne zajednice će biti održana u roku od 30 dana od dana objavljivanja rezultata izbora.

Sjednica može biti održana uz prisustvo najmanje dvije trećine izabраниh članova.

Savjet mjesne zajednice donosi odluke većinom glasova ukupnog broja članova.

Savjet mjesne zajednice na prvoj sjednici bira predsjednika i zamjenika predsjednika iz reda svojih članova.

Predsjednik savjeta predstavlja mjesnu zajednicu.

#### Član 47.

Zbor građana mjesne zajednice je organ konsultovanja o lokalnim poslovima.

Zbor građana se konsultuje o pitanjima o kojima odlučuje savjet mjesne zajednice, kao i o pitanjima o kojima odlučuje Općinsko vijeće dvotrećinskom većinom, te u postupku donošenja planova Općine koji se odnose na teritoriju mjesne zajednice.

Zbor građana može davati inicijative o pitanjima iz nadležnosti mjesne zajednice, Općine i institucija koje vrše javne ovlasti.

Inicijativa zbora građana mjesne zajednice, koju je podržalo najmanje 10% građana mjesne zajednice, obavezuje savjet mjesne zajednice i organe općinske vlasti da se o njoj izjasni.

Zbor građana saziva savjet mjesne zajednice po potrebi, a obavezno na zahtjev Općinskog vijeća, općinskog načelnika, ili na inicijativu najmanje 50 građana mjesnog područja za koje se održava zbor.

#### Član 48.

Zbor građana se održava jedinstveno za mjesnu zajednicu ili po dijelovima za mjesna područja.

Odluku o načinu održavanja zbora građana donosi savjet mjesne zajednice u skladu sa pravilima mjesne zajednice.

#### Član 49.

Nadzor nad radom organa mjesne zajednice obavlja Općinsko vijeće, na način utvrđen pravilima mjesne zajednice.

#### Član 50.

Financijska sredstva mjesnoj zajednici obezbjeđuju se u Budžetu Općine, u skladu sa programom rada Općinskog vijeća, cijeneći potrebe i interese mjesne zajednice.

#### Član 51.

Stručne i administrativno – tehničke poslove za potrebe organa mjesne zajednice, vrši sekretar mjesne zajednice.

#### Član 52.

Postupak osnivanja i ostala pitanja od značaja za funkcionisanje mjesne zajednice i njenih organa, uređuju se pravilima mjesne zajednice.

### **VI – NEPOSREDNO UČESTVOVANJE GRAĐANA U ODLUČIVANJU**

#### Član 53.

Građani na teritoriji Općine, mogu neposredno da učestvuju u odlučivanju o lokalnim poslovima iz samoupravnog djelokruga Općine:

- referendumom,
- mjesnim zborom građana,
- građanskom inicijativom,
- drugim oblicima.

#### **Referendum**

#### Član 54.

Općinsko vijeće raspisuje referendum radi odlučivanja o promjeni granica Općine, a može donijeti odluku o raspisivanju referenduma o određenim pitanjima iz svoje nadležnosti, kao i inicijativama za donošenje izmjene i dopune zakona i prostornih planova.

Pravo na odlučivanje na referendumu imaju građani koji imaju prebivalište na području Općine i koji su upisani u birački spisak.

Postupak održavanja referenduma propisuje Općinsko vijeće odlukom o raspisivanju referenduma u skladu sa zakonom.

#### Član 55.

Prijedlog za raspisivanje referenduma mogu podnijeti:

- jedna trećina vijećnika Općinskog vijeća;
- općinski načelnik;
- jedna petina mjesnih zajednica, o čemu odluku donose savjeti mjesnih zajednica.

#### **Mjesni zbor građana**

#### Član 56.

Na mjesnom zboru građani mogu raspravljati o svim pitanjima iz samoupravnog djelokruga Općine, te predlagati način rješavanja određenog pitanja, odnosno donošenja akata iz djelokruga Općinskog vijeća.

Mjesni zbor građana se održava za mjesno područje.

Građani na mjesnom zboru mogu inicirati i organizovanje poslova koji neposredno utiču na svakodnevne potrebe života i rada građana kao što su:

- izgradnja i održavanje puteva, kanalizacije, vodovoda i drugih komunalnih potreba i infrastrukture;
- uređenje naselja, izgradnju i uređenje parkova, nasada, dječijih igrališta, sportskih i drugih objekata;
- zaštita okoliša i slično.

## **Građanska inicijativa**

### Član 57.

Građani mogu Općinskom vijeću uputiti inicijativu za donošenje propisa i drugih akata, u cilju rješavanja određenog pitanja.

Ukoliko su za realizaciju građanske inicijative potrebna sredstva, inicijativa mora sadržavati prijedlog načina njihovog obezbjeđivanja.

Općinsko vijeće dužno je razmotriti građansku inicijativu koju je svojim potpisom podržalo najmanje 2% birača upisanih u birački spisak.

Ukoliko Općinsko vijeće ne prihvati inicijativu birača iz prethodnog stava, najmanje pet hiljada građana upisanih u birački spisak svojim potpisima može pokrenuti inicijativu za izjašnjavanje građana referendumom o toj inicijativi.

Ukoliko Općinsko vijeće ne prihvati inicijativu birača iz prethodnog stava, na zahtjev koji je potpisalo najmanje 25% građana upisanih u birački spisak Općinsko vijeće je dužno raspisati referendum.

## **Slobodni oblici udruživanja**

### Član 58.

Općina afirmiše društvene inicijative i aktivnosti na polju razvoja civilnog društva, socijalne brige, očuvanja okoline, kulturne i umjetničke baštine preko organizacija i udruženja građana, čiji su ciljevi humanitarnog, obrazovnog, naučnog, sportskog, rekreativnog, kulturnog i vjerskog karaktera.

Općina pridaje važnost konsultacijama sa stranim državljanima, sa boravištem na njenoj teritoriji i afirmiše njihovo aktivno učestvovanje u izgradnji ekonomskog, kulturnog i socijalnog života građana Općine.

Dajući značaj navedenim oblicima udruživanja građana, Općina obezbjeđuje :

- informacije i pristup administrativnim procedurama;
- pristup strukturama i općinskim uslugama, prezentaciju projekata ili dokumentovanje drugih aktivnosti;
- prezentiranje Općinskom načelniku i Općinskom vijeću prijedloga, primjedbi i sugestija.

## **Akcija građana**

### Član 59.

Svaki građanin kao pojedinac, može dati značajan doprinos u osmišljavanju akcija i aktivnosti Općine iz njenog samoupravnog djelokruga.

Građani prijedlog akcija dostavljaju općinskom načelniku i Općinskom vijeću pismeno ili telefonom.

## **Organi participacije**

### **Član 60.**

Općina podstiče osnivanje organa participacije administrativnim aktivnostima i afirmiše vođenje općinskih usluga na osnovu pojedinačnih zahtjeva.

Općina favorizuje i afirmiše formiranje udruženja korisnika usluga, osiguravajući im neophodnu podršku.

Općina favorizuje osnivanje organa participacije koji predstavljaju djecu i mlade, s ciljem da promovira njihovo aktivno učestvovanje u izgradnji civilnog društva.

Jednom godišnje organi participacije dužni su pismenim putem izvještavati Općinsko vijeće i mjesne zajednice o svojim aktivnostima.

Općina favorizuje aktivno učestvovanje međunarodnih organizacija, nevladinih organizacija stranih država i stranih državljana u definiranju programa i aktivnosti organa Općine.

Predstavnici iz prethodnog stava mogu aktivno učestvovati i davati prijedloge, sugestije, mišljenja na materijale koji se razmatraju na sjednici Općinskog vijeća, te mogu uzimati aktivno učešće u diskusijama, ali bez prava glasa kod donošenja konačnih odluka.

## **Molbe, žalbe, prijedlozi**

### **Član 61.**

Građani pojedinačno ili udruženo mogu upućivati općinskom načelniku ili Općinskom vijeću molbe, žalbe i prijedloge sa ciljem da promoviraju aktivnosti za postizanje zajedničkih interesa.

Molbe, žalbe i prijedlozi koji su izvan samoupravnog djelokruga Općine, općinski načelnik i Općinsko vijeće prosljeđuju na rješavanje nadležnim organima.

Odgovor na podnesene molbe, žalbe i prijedloge Općinsko vijeće i općinski načelnik su dužni dati u što kraćem roku, a najkasnije u roku od 30 dana, te preduzeti odgovarajuće mjere u skladu sa zakonom i ovim statutom.

## **Savjetovanje**

### **Član 62.**

Općina sa ciljem da poboljša aktivno i efikasno učestvovanje građana u odlučivanju i transparentnost administrativnih poslova, promovira razne oblike savjetovanja putem:

- mjesnog zbora građana;
- organizacija korisnika javnih usluga;
- javnog poziva građanima da prezentiraju prijedloge i zapažanja u odnosu na mjere i rad organa vlasti;
- ankete javnog mnjenja;
- javnog informiranja.

## **Konsultativni sastanci**

### **Član 63.**

Općina prije donošenja određenih odluka, promovira razne oblike savjetovanja sa asocijacijama i udruženjima građana, putem konsultativnih sastanaka.

## **Pravo pristupa**

### **Član 64.**

Općina osigurava pravo pristupa zainteresovanim građanima administrativnim procedurama, dokumentima i informacijama, strukturama i uslugama, na način i pod uslovima propisanim zakonom.

## **VII - FINANSIRANJE I IMOVINA OPĆINE**

### **Član 65.**

Finansiranje Općine vrši se iz poreza, taksi, prihoda od pokretnih i nepokretnih stvari, koncesija, dotacija, naknada, zaduživanja kod banaka i drugih finansijskih organizacija, donacija i drugih prihoda utvrđenih zakonom i drugim propisima.

Općina može radi zadovoljavanja potreba građana prikupljati sredstva na osnovu neposrednog izjašnjavanja građana u skladu sa zakonom, odnosno ovim statutom.

Odluku o pokretanju postupka prikupljanja sredstava na način utvrđen predhodnim stavom, donosi Općinsko vijeće na prijedlog:

- jedne trećine vijećnika Općinskog vijeća;
- općinskog načelnika;
- jedne petine mjesnih zajednica Općine, o čemu odluku donose savjeti mjesnih zajednica.

### **Član 66.**

Ostvarenim prihodima Općina samostalno raspolaže kroz budžet, koji donosi Općinsko vijeće u skladu sa zakonom i drugim propisima.

### **Član 67.**

Imovinu Općine čine stvari, prava i novčana sredstva.

Imovinom Općine upravlja i raspolaže Općinsko vijeće na način i pod uslovima propisanim zakonom i propisima donesenim na osnovu zakona.

## **VIII – PROPISI I DRUGI AKTI OPĆINE**

### **Član 68.**

Općinsko vijeće donosi propise: Statut, Budžet, odluke, pravila, pravilnike i poslovnik o radu Općinskog vijeća.

Općinsko vijeće donosi slijedeće akte: odluke, rješenja, zaključke i druge akte.

Poslovníkom o radu Općinskog vijeća utvrđuje se postupak donošenja propisa i akata Općinskog vijeća.

### **Član 69.**

Općinski načelnik, u izvršavanju propisa i općih akata iz samoupravnog djelokruga Općine, donosi propise: uredbe, naredbe, pravilnike, uputstva i druge propise.

Općinski načelnik donosi slijedeće akte: odluke, rješenja, zaključke, naredbe i druge akte.

## Član 70.

Acti organa i tijela Općinskog vijeća su rješenja i zaključci.

Protiv prvostepenih akata općinskog načelnika i organa i tijela Općinskog vijeća, donesenih na osnovu propisa Općinskog vijeća i općinskog načelnika, u drugom stepenu po žalbi, rješava Drugostepeni organ za žalbe, koji obrazuje Općinsko vijeće.

Pri donošenju rješenja i drugih akata iz prethodnog člana, primjenjuju se pravila upravnog postupka, utvrđena Zakonom o upravnom postupku.

## **IX – PROMJENE STATUTA**

### Član 71.

Promjene Statuta vrše se putem amandmana.

Prijedlog za pokretanje postupka za promjene Statuta može podnijeti jedna trećina vijećnika Općinskog vijeća, općinski načelnik i Komisija za Statut i propise.

Prijedlog iz stava 1. ovog člana mora biti obrazložen, a podnosi se predsjedavajućem Općinskog vijeća u pismenoj formi.

Inicijativu za promjene Statuta Općine mogu dati građani, putem mjesnih zborova.

### Član 72.

O prijedlogu za promjenu Statuta raspravlja se na sjednici Općinskog vijeća.

Prihvaćeni prijedlog za promjenu Statuta dostavlja se vijećnicima Općinskog vijeća, savjetima mjesnih zajednica, parlamentarnim strankama zastupljenim u Općinskom vijeću, udruženjima građana koja djeluju na području Općine, radi vođenja javne rasprave o predloženim promjenama i davanja primjedbi i prijedloga.

Ako se ne prihvati prijedlog za promjene Statuta, isti prijedlog se ne može ponovo staviti na dnevni red sjednice Općinskog vijeća, prije isteka šest mjeseci.

Promjena Statuta je usvojena ako se za istu izjasni dvije trećine vijećnika Općinskog vijeća.

Promjena Statuta vrši se odlukom Općinskog vijeća.

## **X – JAVNOST RADA I TRANSPARENTNOST**

### Član 73.

Općina obezbjeđuje javnost rada u postupku donošenja odluka, uključivanjem javnosti, odnosno omogućavanjem građanima da neposredno učestvuju u postupku donošenja i odlučivanja, u skladu sa zakonom i ovim statutom.

### Član 74.

Transparentnost rada Općina ostvaruje kroz otvorenost postupka realizacije općinskih propisa i akata, primjenu zakona i drugih propisa, te kroz upoznavanje javnosti sa njihovom primjenom.

Transparentnost se obezbjeđuje kroz slobodu pristupa informacijama i informisanje javnosti, objavljivanjem izvještaja, budžeta i drugih sadržaja, putem sredstava javnog informisanja, vlastitog informacionog sistema, izdavanjem informativnog biltena i druge oblike informisanja.

## Član 75.

Općina će objaviti ili na drugi način učiniti javno dostupnim svoje propise i akte.

Općina neće objaviti ili na drugi način učiniti javno dostupnim propise i akte čije bi objavljivanje bilo u suprotnosti sa zakonom, drugim propisima i aktima Općinskog vijeća, kao ni informacije koje uključuju lične interese koje se odnose na privatnost trećeg lica, osim ako je to opravdano javnim interesom.

## **XI – PRELAZNE I ZAVRŠNE ODREDBE**

### Član 76.

Zamjenici predsjedavajućeg Općinskog vijeća i zamjenik općinskog načelnika, čiji izbor je zvanično potvrdio PIK OSCE u okviru rezultata Izborna 2000. godine, ostaju na funkciji do prestanka mandata.

### Član 77.

Pravila mjesne zajednice i Odluke o osnivanju mjesnih zajednica Općinsko vijeće će donijeti u roku od 60 dana, od dana stupanja na snagu ovog statuta.

### Član 78.

Prečišćeni tekst Statuta Općine Centar Sarajevo primjenjuje se od dana kada je objavljen u "Službenim novinama Kantona Sarajevo".

Broj: 01-49-1925/04

Sarajevo, 21.09.2004. godine

PREDSJEDNIK  
KOMISIJE ZA STATUT I PROPISE

Jasmina Trgovčević